



UKA 2016/123
23. sep. 2016
Ane Hansen

Uunga siunnersuut: Aalisarnej pillugu inatsisartut inatsisaata allangortinnera pillugu Inatsisartut inatsisaat nr. xx, xx.xxxx 2016-imeersoq.
(Aalisarnermut, Piniarnermut Nunalerinermullu Naalakkersuisoq)

Inatsisissatut siunnersuutip qulequta takuinnarlugu arlaqarluta eqqarsartarunarpugut, kiisami tassa taanna nutartissallugu inarsassallugu qilanaarisartagarput takkuteqaat taannaangilarli. Piffissanngoraluarpormi nunatta aningaasarsiornikkut namminiilernissaannut aqutissat pisariaqartut tamaasa eqqarsaatigalugit angisuumik siunissamullu isigisumik eqqarsarluni suliaqarnissamut, uanguinnaangunangilaq suliaassanut taamaattunut aloriarnissanullu pingaaruteqartunut utaqqikatattut.

Taamatut oqariarlunga inatsisissami siunnersuummi pineqartoq pillugu Inuit Ataqatigiinit ima oqaaseqassuugut:

Inatsisissatut siunnersuut pillugu Aalisarnermut Naalakkersuisup saqqummiussaqaqarnermini oqaatigaa siunnersuut una siunertaqartoq pisortat ingerlatsineranik aaqqissuussineq pillugu ataavartumik piviusunngortitsinissaq pisariillisaanissarlu Naalakkersuisut kissaatigigaat.

Kissaat tamanna Inuit Ataqatigiinit isumaqatigilluinnarparput, sutigummi tamatigut innuttaasut atugaannut pitsaanerpaaq ujartorlugu pisariillisaasariaqarpugut.

Siunnersuutilli imarisaa qiviaraanni siunertarisamut naammassinninnermik ersarissumik kinguneqarsorinangilaq, siunnersuummi pineqarput aalisarnermik aalisarsinnaanermut akuersissutinik tunniussisoqarnerani allaffissornikkut aqutsineq isumageqqullugu kommunalbestyrelsinut peqqusisinaanneq. Inatsisissamilu erseqqissarneqangilaq aalisarsinnaanermi akuersissutinik tunioraanermi akisussaaffik tamaat kommunalbestyrelsenut tunniunniarneqarnerseq. Inatsisissaq aasaq junip 2-ani Julip 1-nut ingerlanneqarpoq tassa naliginnaasumik sulisut attuumassuteqartullu amerlasuut sulinngiffeqarnerisa nalaani tusarnianeq ingerlanneqarluni.

Aningaasaqarnermut Naalakkersuisoqarfiup tusarniummi apeqqusiinerisa ilaannut akissutigineqarpoq, Kommunalbestyrelsinut suliaasamik tunniussisoqassappat qanoq annertutigisumik tunniussisoqassanersoq qanoq imaqatitsisoqassanersoq inatsisissatut siunnersuummi ilanngunneqarsimangimmat, tamakkulu pissutigalugit sulisut qassit peerneqassanersut iluamik erseqqissarneqarsimagitsoq.

Inatsisissamut siunnersuummut kommuni akisimasup appaanut tassalu Kommuneqarfik Sermersuumit apeqqutigineqarpoq qanoq illilluni assigiingitsumik sulisoqanginnissaa qulakkerniarneqarnerseq. Naalakkersuisoqarfimmiit akissutigineqartunut ilaavoq inatsisissamut siunnersuummi tusarniaassutigineqartut tunniunnissaanut killiliussaqaqangiutereersoq iluarsineqarnimasoq, taalaalillunilu allanguutissatut siunnersuummi angallatit meterinik 6-inik anginerusut mikinerusullu kisimik pineqarunnaarlutik. Inatsisissamut tusarnianermi Naalakkersuisoqarfiup akissutaai imatut paasineqarsinnaapput aqutsinermi ilaannakortumik tunniussisoqarsinnaasoq. Akisussaaffinnik ilaannakortunik nussuinerit manna tikillugu misilittagaqarnerluffigaagut amerlanertigut pisariillisaanermik kinguneqartangimmata aammalu innuttaasunut pisariusumik kinguarsaanermillu annertuumik misigisaqarfiusarmata.

Inuit Ataqatigiinniit akisussaaffinnik ersarissuliorluni piarersarluakkanik nussuinerit isumaqataaffigaagut, isumaqataangilagulli akisussaaffinnik ilaannakortunik piarersarluagaangitsunillu nussuinnermut tamanna misilittakkagut malillugit innuttaasunik sullissinnermi pitsaangitsumik pisortanullu akisuninngorlutik kinguneqartarmata.

Inatsisissatut siunnersuut una ersarissuliorfigineqangilaq taamaattumik imaaliallaannarlugu akuersarsinnaangilarput, taamaakkaluartoq tusarnianermi apequtigineqartut ersarissuliorfigineqangitsulli apeqqutaasa qulaajarnissaat siunertarlugu inatsisissatut siunnersuut Inatisartut Aalisarnermut, Piniarnermut, Nunalerinermullu Ataatsimiisilalianik nalilersoqqinneqassasoq inassutigerusupparput.

Naggataatigut oqaatigissuarput uggorigatsigu tusarniarup naammassinerani tusarniaffigineqarsimasut ikittuinnaat akissuteqarmammata.